

**Uunga siunnersuut: Greenland Oil Spill Response A/S pillugu Inatsisartut inatsisaata
atorunnaarsinneqarnissaa pillugu Inatsisartut inatsisaat
Aatsitassanut Inatsisillu Atuutsinneqarnerannut Naalakkersuisumit saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Asii Chemnitz Narup, Inuit Ataqtigiit
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Kuno Fencker, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Jens Napaattoq, Naleraq

UKA 2022-mi ulloq 4. oktober 2022 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Greenland Oil Spill Response A/S pillugu Inatsisartut inatsisaat nr. 4, 4. juni 2012-imeersoq atorunnaarsinneqassasoq aammalu atorunnaarsitsineq Inatsisartut inatsisaata atuutilernerata nalunaarutigineqarnerata aqaguani atuutilissasoq siunnersuutigineqarpoq. Taamaalilluni sine-rissap avataani ikummatissaanik misissuinissamut qalluinissamullu akuersissutinik atuutto-qanngimmat aammalu akuersissutinik nutaanik tunniussisoqartussaangimmat, ingerlatseqa-tigiiffiup uuliamik mingutsitsinermik akiuiniarnissamik siunertaqartup atuutsiinnarnissaa tunngavissaqarsorineqarunnaarpoq.

Siunnersuuteqartulli ikummatissanik misissuillunilu qalluineranut tunnganngitsunit uuliamik mingutsitsinermik akiuinissamut upalungaarsimaffiup attatiinnarnissaa suli kissaatigaa, taa-maattumillu ingerlatseqatigiiffiup pigisai nalillit ingerlataalu allami ingerlateqqinneqassapput.

2. Siunnersuutip Inatsisartunit siullermeerneqarnera

Siullermeerinninnermi siunnersuut amerlanerussuteqartunit taparserneqarpoq. Taamaattorli ingerlatseqatigiiffiup pigisaasai nalillit akiligassaasalu Sikuki Nuuk Harbour A/S-imut nuunneqarnissaat ikinnerussuteqartunit akilerineqartoq oqaatigineqarpoq.

3. Tusarniaanermi akissutit

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq.

Siunnersuummilli tusarniaanermut piffissaritinneqartup sivikinnera uparuarneqassaaq. Siunnersuummut nalinginnaasumi nassuiaatini allassimavoq siunnersuut piffissami 5.-26. juli tusarniaassutigineqarsimasoq, tassa sapaatit akunnerini pingasuni (ulluni suliffinni 15-ini). Pingaarnertut malittarisassatut sapaatit akunnerini sisamani tusarniaanissamut piffissaqartitsinissaq.

4. Ataatsimiititaliap siunnersuummik suliarinninnera

Amerlanerussuteqartut siunnersuummut tapersiinerat ataatsimiititaliamit maluginiarneqarpoq. Siunnersuutip kingunerissavaa ingerlatseqatigiiffiup atorunnaarsinneqarnera. Tamatumalu peqatigisaanik ingerlatseqatigiiffiup pigisaasai nalillit akiligassaasalu Sikuki Nuuk Harbour A/S-imut nuunneqarnissaat ikinnerussuteqartunit akilerineqartoq ataatsimiititaliamit maluginiarneqarpoq. Tamatuma allanit akerlerineqarneranik ataatsimiititaliaq maluginiagaqanngilaq.

Taamatut naatsumik isumaliutissiissuteqarluni inernilunneqartariaqarpoq siunnersuutip akuerineqarnissaa pinngitsoorsinnaanngimmat. Tassunga atatillugu ingerlatseqatigiiffiup pigisaasa nalillit akiligassaalu ingerlatseqatigiiffimmut Namminersorlutik Oqartussanit pigineqartumut allamut sapinngisamik naapertuunnerpaamik nuunneqarnissaat ataatsimiititaliamit naatsorsuutigineqarpoq.

Apeqquut taanna siunnersuummi matumani qitiusumik qulequtarineqartup aalajangiiffigineqarnissaanut tunngatillugu aalajangiisuunngitsutut ataatsimiititaliamit isigineqarpoq. Aaqqiisutissaq sorleq pitsaanerpaatut Naalakkersuisunit, Namminersorlutik Oqartussat aktiaatilitut soqutigisaannik ingerlatsisutut, taamanikkussamut qulaajarneqareerpat apeqquut taanna ataatsimiititaliap isumaa malillugu qaqinngitsoorneqarsinnaanngillat. Tassunga atatillugu Inatsisartut Inatsisartullu ataatsimiititaliaata susasaqartup tamanna pillugu ilisimatinneqarnissaa, pisariaqarpallu sulinermi tassani akuutinneqarnissaa, ataatsimiititaliamit naatsorsuutigineqarpoq.

5. Siunnersuutip aningaasaqarnikkut allaffissornikkullu kingunerisassai

Siunnersuutip akuersissutigineqarnerani aningaasatigut kingunerisassai nalinginnaasumik nassuiaatit ataani nalunaarneqarsimapput. Tunngavissatut pigineqartut tunngavigalugit allamik naliliinissamat ataatsimiititaliaq tunngavissaqanngilaq.

6. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqtigiiinneersut Siumumeersullu siunnersuut akuerineqassasoq inassutigaat.

Ataatsimiititaliami ikinnerussuteqartut Naleqqameersup Demokraatineersullu siunnersuut itigartinneqassasoq inassutigaat.

Inassuteqaammut tunngatillugu Demokraatit ima ikinnerussuteqarlutik oqaaseqaateqarput:

”Demokraatit Greenland Oil Spill Response A/S pillugu inatsit allanngortinneqarnissaa imaatsillugu Greenland Oil Spill Response A/S atorunnaarsillugu isumaqtiginnigilaat. Nunaoil A/S siunissaa iluamik qulaajarneqanngippat una siunnersuut isummerfigineqarsinnaasorinnigilarput.”

Inassuteqaammut tunngatillugu Naleraq ima ikinnerussuteqarlutik oqaaseqaateqarpoq:

”Greenland Oil Spill Response A/S-ip atorunnaarsinneqarnera aammalu atorunnaarsitinerup Inatsisartut inatsisaata atuutilernerata nalunaarutigineqarnerata aqaguani atuutilernissaa Naleqqamit tusaatissatut tiguneqarpoq.


Ikummatissanilli misissuillunilu qalluinnut tunnganngitsunit uuliamik mingutsitsinermik akiuniarnermut atatillugu ingerlatseqatigiiffiup pigisaasa nalillit ingerlataasalu Sikuki A/S-imi ingerlateqqinneqarnissaat Naleqqamit eqqarsarnartoqartinneqarput.

Uuliamik mingutsitsinermut akiuniarnermik Sikuki A/S ingerlatsinnigilaq aammalu Sikuki A/S-imi inissaasuaneq pissutigalugu isumaqarpugut pigisat nalillit ingerlataallu taarsiullugu Sisimiuni imaluunniit Qeqertarsuup Tunuani aalisarnerfinnut qanittuni inissinneqarnissaat aaqqiissutissaassasoq, tassami inissaasuaneq Sikuki A/S-imit oqaatigineqareerpoq aammalu atortut pisariaqalissappat kingorna inissinniarnarat aamma immikkut suliakkersuutaassammat.

Naleqqamiittaaq maluginiarneqarpoq inersuarmi siullermeerinnilluni oqallinnermi uuliamik ujaasinerup unitsinneqarnissaa ikinnerussuteqartunit Inuit Ataqtigiiinneersunit taamaallaat taparserneqartoq.

Peqatigisaanillu aningaasat uuliaanngitsumut atorneqassappata ilaatigut atomip nukingata periarfissaanera amerlanerussuteqartunit taparserneqarpoq.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Hans Peter Poulsen
Siulittaasoq




Jens Frederik Nielsen
Siulittaasup tullia



Asii Chemnitz Narup




Mariia Simonsen



Kuno Fencker



Lars Poulsen



Jens Napaattoq